



40-4514

了翁上座請大藏乃至  
家書置之武州紫雲山  
我微天培院庭府中永  
為學者不敢許出院內  
當山一世鐵牛機諱誌

B 64853

大方廣佛華嚴經疏演義鈔卷第二十六  
清涼山大華嚴寺沙門澄觀述

清涼山大華嚴寺沙門澄觀述

**第三明支類者**

第三明支類等者分二初標二釋今初支卽支流  
支者分也亦如樹枝從一樹身分出支分本卽華  
嚴故此中言流如從一池流出諸派故大部如池  
別行如派故類卽流類此中言流取相似流類之  
義謂餘別經不從大部出義勢相似卽今經流類  
故

名號品菩薩本業經一卷是淨行品小十住經一卷是十住品大十住經四卷及漸備一切智德經四卷並是十地品等目菩薩所問三昧經一卷是十定品無邊功德經一卷是壽量品如來性起微密藏經兩卷是出現品度世經六卷是離世間品羅摩伽經三卷是入法界品此等並是隨器受持大本流出

於中復二下二釋分二今初顯支流也小十住經者以古德譯十地亦云十住或云十住地今言小者卽地前十住今言大者卽十地經非以卷少爲小等言漸備一切智德者一切智卽佛智十地卽

佛智中十德如海十德以十地之法後後深於前故云漸備故地影像中明十地行相次第現前則能趣入一切智智卽漸備義又如阿耨達池流出四河復更增長乃至入海又如寶珠十德後後過前皆漸備義言無邊功德經者以前刹之劫爲後刹之日後後勝前明功德無邊矣言羅摩伽者卽入法界之梵語也羅者離垢染義摩者轉義伽者一合義謂離垢染轉卽淨法界一合卽入義二明流類謂修慈經一卷金剛鬘經一卷如來不思議境界經一卷竝是華嚴流類而非本部別行

釋述 卷第十一

或是別行來未盡者未敢詳定餘如纂靈記辯

二明流類等者疏文有二先正明是類非本部之  
支後或是別行下彰有支義古德見今經所無將  
爲流類本部來既未盡是此別行復何可定多聞  
闕疑故云未敢詳定

#### 第四論釋者略舉其四

第四論釋者下分二初總標舉二別釋今初標也  
一龍樹既得下本遂造大不思議論亦十萬頌備傳  
西域此方十住毘婆沙論十六卷卽是彼論釋十地  
中初之二地

一龍樹下二別釋有四今初可知

二世親菩薩造十地論釋十地品魏朝勒那三藏及  
菩提流支各翻一本光統奏請令二三藏叅成一本  
爲十二卷卽今現傳

三北齊劉謙之於清涼山感通造論六百卷備釋一  
經

四後魏僧靈辯於五臺山頂戴此經行道一載遂悟  
玄旨造論一百卷亦傳於世  
三北齊劉謙之等者及與靈辯並如纂靈記下當  
重出但今云行道一載卽是傳文若准論序不言

年數又但一於懸瓮山嵩巖寺頂戴華嚴經勇猛行道足破血流膝步慇懃精誠感悟不言清涼多是隨方之人欲美其處故取太原當處明之傳既云在清涼必託勝境況傳中所明經歷數處造論方終百軸

第八傳譯感通分二先明翻譯年代後明傳通感應

第八傳譯下分二初標章二別釋今初也

前中此經前後通唯二譯並其補闕四本不同

前中下第二別釋分二初明翻譯年代亦分爲二  
初略明一晉義熙下二別釋分四

一晉義熙十四年北天竺三藏佛度跋陁羅此云覺賢於楊州謝司空寺翻梵本三萬六千頌成晉經五十卷或六十卷沙門法業筆受慧嚴慧觀潤色謝司空寺者卽今潤州興嚴寺是由興華嚴故

佛度跋陁羅此云覺賢等者案纂靈記本姓釋氏迦維羅衛國人甘露飯王之苗裔賢三歲而孤八歲喪母爲外氏所鞠從祖鳩摩利聞其聰敏乃度爲沙彌同學一月誦習賢乃一日當之及受具戒博覽羣經多所綜達少以禪律馳名嘗與同學僧伽達多遊處積年知其已證不還果常願遊方以

弘至化會秦沙門智嚴至罽賓國問彼國僧誰可  
流化東土咸云賢可賢本受禪業於佛大仙佛大  
仙時亦在罽賓國知嚴求人東化亦謂嚴曰可以  
振維僧徒宣授正法卽賢其人也嚴卽披誠至請  
賢遂默而許焉於是辭師東邁涉路二載寒暑備  
受艱危罄盡或層巖四合鳥道躋雲或連冰千里  
風行雪卧每清暉啓曙卽潛伏幽林皓月淪霄乃  
崩波永路飛梯架迴捫索憑虛危懼日尋資糧時  
絕至於交趾方漸夷途附舶海行備經危險方達  
青州東萊郡聞羅什在長安欣然而來後遊東晉

至安帝義熙十四年吳郡內史孟顗右衛將軍褚  
叔度請譯此經別造淨室其年三月十日起首賢  
乃手執梵文共沙門法業慧嚴等百有餘人於道  
場寺詮譯指文會理通言適妙故道場寺猶有華  
嚴堂焉永嘉六年卒時春秋七十有一手屈三指  
明得阿那含果餘廣如傳業公未詳氏族風格秀  
整學無常師遍閱群教每以爲未能探微照極常  
快然不足後遇覺賢請譯華嚴籌諮義理數歲之  
後廓然有所通悟因顧其友人曰聖教司南於是  
乎在遂敷弘幽旨鬱爲宗首著旨歸兩卷言行於

世今少見本者以希聲初啓未遑曲盡時月淹久故多廢替慧嚴慧觀卽什公入俊之二筆格高簡經論深博備於僧史謝司空寺者卽道場寺從檀越呼之嚴觀並此寺僧言今潤州興嚴寺者晉時稱南楊州其境則潤今分出爲潤州耳

二大 唐永隆元年中天竺三藏地婆訶羅此云日於西京太原寺譯出入法界品內兩處脫文一從摩耶夫人後至彌勒菩薩前中間天主光等十善知識二從彌勒菩薩後至三千大千世界微塵數善知識前中間文殊申手過一百一十由旬按善財頂十五

行經大德道成律師薄塵法師大乘基法師等同譯復禮法師潤文依六十卷本爲定

日照三藏者住摩訶菩提及那爛陀寺風儀溫雅神機朗逸負笈研精琢玉成器屬玄奘三藏傳教東歸占風聖代以永隆初至於京師高宗弘顯釋門詔會龍象道成律師薄塵法師等十大德於魏國西寺翻譯經論時有賢首法師先以華嚴爲業每歎大教闕而未圓往就問之云賚第八會文來至此賢首遂與三藏對校果獲善財求善知識天主光等十善友文乃請譯補闕復譯密言等經十

有餘部合二十四卷垂拱年中右脇而卧無疾而終門人等建塔於龍門山伊水之右後梁王武三思奏請置伽藍制以香山爲名月殿凌煙波涵倒景珠幡散迥影入飛雲功不日成乃迴天眷法門盛事今古莫儔

三證聖元年于闐三藏實義難阨此云喜學於東都佛授記寺再譯舊文兼補諸闕計益九千頌通舊總四萬五千頌合成唐本八十卷大德義淨三藏弘景律師圓測法師神英法師法寶法師賢首法師等同譯復禮法師綴文

三證聖元年等者具如開元釋教錄第九證義譯文僧總一十三人俗官五人弘景禪師有表案經序中本於大遍空寺親授筆削故表云陛下又親臨法座煥發序文自運仙毫首題名品七曜垂象景麗於三明八體成文光敷於五義法寶分行而錯落淨華入貫而昭彰九會真詮詞中悉現百城奧吉字下皆明

四則於前第三本中雖益數處却脫日照三藏所補文殊按善財頂之文卽賢首師以新舊兩經勘以梵本將日照補文安喜學脫處遂得文續義連其文之

撰述

聖經卷第廿九

一

卷十

# 要至下當辯今之所傳卽第四本

其文之要至下當辯者八十卷初疏中具明意云  
 前七十七末善則自云我以文殊故見諸難見者  
 彼大功德尊願速還瞻觀七十九末彌勒廣示後  
 友讚文殊德令往問文殊又云善男子汝當往詣  
 文殊師利善知識所而問之言菩薩云何學菩薩  
 行云何入普賢行門云何成就云何廣大云何隨  
 順云何清淨云何圓滿善男子彼當爲汝分別演  
 說何以故文殊師利所有大願非餘無量百千億  
 邪由他菩薩之所能有等廣讚竟結云善男子汝

應往詣文殊之所莫生疲厭今無文殊按頂十五  
 行經令彌勒記言爲虛善財不依彌勒之教先來  
 摧往復違昔心又闕智照無二之相令後見普賢  
 亦無因起故今有之諸過皆離故云其文之要上  
 言文續義連

其第三本先已流傳故今代上之經猶多脫者卽第  
 三本願諸達識見闕而續之  
 二明傳通感應者自晉譯微言雙童現瑞唐翻至教  
 則甘露呈祥冥衛昭然親糴御筆  
 二明傳通感應下疏文分三初正辯感應二出感

應所以三感慶逢遇初中有六一翻譯二造論三書寫四讀誦五觀行六講說今初晉譯微言雙童現瑞者謂初於道場寺譯堂前池中每二青衣童子從池中出遊捧以香花舉衆皆見以此經久在龍宮龍王慶此傳通故令龍王給侍亦有善神護諸左右故下云冥衛昭然言唐翻至教甘露呈祥卽則天夢普天降甘露故經序云甘露流津預夢庚申之夕膏雨灑潤後覃壬戌之辰以十四日辛酉初譯前後各一日有感徵也冥衛昭然下成上二譯此句成上晉譯如上已引亦有善神護諸左

右故言親紓御筆者卽成上唐翻然事卽因講以則天言初譯之日夢甘露以呈祥又是講新譯經故入譯經之中傳云新經初譯之後佛授記寺諸大德請藏和尚講勅令十月十五日開講便卽入文至十二月十二日晚上講至華藏世界海震動之文講堂內及寺院中忽然震動于時道俗數千共覩歎未曾有三藏法師實义難掩及當寺大德明詮律師德感法師述茲靈應具以表聞都維那慧表署狀爲首以聖曆三年臘月十九日則天大聖皇后親運御筆批云省狀具云皆因敷演微言

弘揚祕曠初譯之日夢甘露以呈祥開講之辰感地動而標異斯乃如來降跡用符九會之文豈朕庸虛敢當六種之應披覽來狀欣暢盈懷此批及狀具如別錄故云親紓御筆

### 論成西域地震光流志徹清涼則感通玄悟

論成西域等者卽世親菩薩西域記云世親菩薩是無著之昆弟也性有聰敏良緣未具乃以小乘爲業三端妙聳峻若霜峰四辯橫分利如星劍無著知小乘權教接引下機慰疲俗而置化城誘窮子而持糞器遂設方便託病在牀今喚世親示將

去世世親聞已不日至焉無著見之廣說病源因開大教云及吾未死之間讀吾所習經典世親卽讀華嚴乃見毘盧法界普賢行海如日光而總照若帝網之相舍因生信悟歎曰可取利劍斷吾舌根用明已讚小乘之失兄止之曰如人因地而倒亦因地而起昔日以舌毀於大乘今可將舌以讚大乘遂入山披覽大乘造十地論論成之日大地遍震光明洞然國主自謁曰得阿羅漢等果耶答曰皆不得旣未得聖果何以地動答曰貧道小年不信大乘今者良爲造大乘論而得地動故云地

震光流言志徹清涼感通玄悟者此有二人一劉謙之一靈辨法師初傳云北齊大和中第三王子於清涼山求文殊師利菩薩燒身供養其王子下有閻官劉謙之自歎形殘又覩王子焚軀之事乃奏乞入山修道遂賚此經一部晝夜精勤禮懺讀誦心祈妙德以希冥祐絕粒飲水垂三七日形氣雖微而丹憩彌勁忽感髭鬚盡生復丈夫相神彩通悟洞曉幽旨草思精修爰造斯經之論始終綸綜凡六百卷遂以奏聞高祖敬信有倍常日華嚴一教於斯轉盛言靈辨法師者傳云後魏沙門靈

辯大原晉陽人宿殖勝善常讀大乘及見華嚴偏加鑽仰乃頂戴此經入清涼山寺求文殊師利潛護凡歷一歲足破血流肉盡骨穿忽聞空中謂之曰汝止之但思惟此經於是披卷豁然大悟後熙平元年歲次大梁正月於清涼寺敬造華嚴論演義釋文窮微洞奧至二年初徙居懸菴山嵩巖寺造餘具如傳若准論序但在懸菴感通今據傳文故亦清涼感通玄悟也

其書寫也則經輝五色楮香四達冬蒸發豔瑞鳥銜花

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

其書寫下後魏安豐郡王延明中山王元熙並以宗室英靈博通歸一虔心無上稽首圓宗嘗以香和墨寫華嚴經一百部金字華嚴經一部皆五香爲藏七寶爲函靜夜良辰清齋行道卽放神光五色照耀臺宇衆所咸覩因而發心不可勝記楮香四達者卽僧德圓不知氏族天水人也常以華嚴爲業讀誦受持妙統宗極遂修一淨園樹諸穀楮并種以香草雜以鮮花每一入園必加洗灌身著淨衣溉以香水楮生三載香氣四達後必立淨室寫經纔書數行每字光發照明院宇又神人執戟

現形警衛又有青衣梵童無何而至手執天花忽申供養餘如傳說冬葵發豔者卽鄧元爽華陰人證聖年中爽有親故暴死經七日却甦說冥中欲追爽爽懼彼令寫華嚴經寫竟爽母墳側先種蜀葵至冬已萃一朝花發燦然榮茂鄉間異之乃爲奏聞則天皇后爲立孝門瑞鳥銜花者僧法誠隱居藍谷後於南嶺造華嚴堂潔潔中外莊嚴旣畢乃圖畫七處九會之像及屈弘文館工書張靜敬寫之誠亦親執香爐專精供養後感瑞鳥形色非常銜花入室旋達供養再三往復經成之後精心

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

轉讀者多蒙感祐

讀誦則渺然履空煥若臨鏡每含舍利適會神僧涌地現金色之身昇天止修羅之陣

讀誦則渺然履空者隋禪定道場僧慧悟京兆人嘗與一僧同在終南栖隱悟受華嚴一持涅槃木食巖栖各專其業忽有一人無因而至拜訊既訖云請一師就宅赴齋二人相推彼曰請讀華嚴法師悟因隨往乃是山神請千羅漢皆推之於上食訖皆飛空而去神呼一童子令侍乃入師口中因便得仙還歸取經辭其友僧渺然而去廣如傳說

煥若臨鏡者卽僧辨才不知何許人幼事裕法師以華嚴爲業久而不悟乃別護淨造香函盛經頂戴行道凡經三載遂夢普賢指授玄義因忽成誦煥如臨鏡每含舍利者卽樊玄智安定人也弱歲修道於京城南投杜順和尚順令誦華嚴爲業勸依此經修普賢行每誦經口中頻獲舍利前後數百粒適會神僧者卽苑律師京兆延興寺僧以貞觀年初途經灞橋舍於逆旅日旣將夕因而寓宿俄有異僧儀服龜弊同至主人別房而止遂命淳醪良肉快意飲歟律師持潔勃然穢之其僧食已

乃漱以灰水閉戶而誦華嚴俄終一軸苑乃束身抱愧側聽玄音未至五更便終六帙苑深自悔責悲泣交懷入房禮懺因而分袂不告名字莫知所之踊地現現金色之身者卽慧祐法師京崇福寺僧戒行精苦事儼和尚專以華嚴爲業每清景良宵焚香專誦出現品後時忽見十餘菩薩從地踊出現身金色皆放光明坐蓮華座合掌聽誦此品經了便隱昇天止修羅之陣者卽般若彌伽薄于闐國沙彌也甚有戒行每誦華嚴爲業忽有人合掌竊謂曰諸天令弟子奉請法師請師閉目遂至

天上天主跪而請曰諸天令與修羅戰屢被摧劙今屈法師誦華嚴經望法力加如其所請乘天寶輶執天幢幡心念華嚴以諸天衆對彼勍敵修羅見之忽然潰散須臾送歸身染天香終身不滅觀行則無生入證偈讚排空海神聽而時雨滂流天童迎而大水瀰漫

觀行則無生入證偈讚排空者卽解脫和尚姓邢氏代州五臺縣人也七歲出家志業弘遠初從介山抱腹巖慧超禪師處詢求定捨超有知人之鑒識其成器告衆曰解脫禪習融明非爾輩所隣未

幾而大啓悟後於五臺西南佛光寺立精舍讀華嚴復依經作佛光觀屢往中臺東南花園北古大孚寺求文殊師利親承言誨云汝今何須親禮於我可自誨責必當大悟後因自求乃悟無生兼得法喜遂慨茲獨善思惟廣濟祈誠大覺請證此心乃感諸佛現說偈曰諸佛寂滅甚深法曠劫修行今乃得若能開曉此法眼一切諸佛皆隨喜解脫更問空中寂滅之法若爲可說得教人耶諸佛卽隱但有聲告曰方便智爲燈照見心境界欲究真實法一切無所見又嘗本州都督請傳香戒法化

旣畢將事東歸都督及衆送至城東日云暮矣思想焚香乃聞城上空中聲曰合掌以爲華身爲供養具善心真實香讚歎香煙布諸佛聞此香尋聲來相度衆等勤精進終不相疑誤故云偈讚排空餘廣如傳然或卽大聖化身事難詳究德廣化博未之有也海神聽而時雨滂流者卽僧道英姓陳氏蒲州人年十八二親爲之要五載同居誓不相觸後於并州炬法師下聽華嚴經便落髮入大行山柏梯寺修行止觀曾屬亢旱講華嚴以祈甘澤有一老翁各二童侍恒來在聽英每異之後因問

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

由緒答云弟子並是海神愛此經故來聽英曰今爲檀越講經請下微雨神乃勅二童童便從牕孔中出須臾滂霈遠近咸賴焉二翁拜謝倏然而滅故云海神聽而時雨滂流其行迹亦如傳說天童迎而大水瀰漫者卽隋朝僧靈幹姓李氏狄道人依衍法師出家年十八能講華嚴住興善寺爲譯經證義沙門後遇疾而死數日乃甦云往兜率見休遠二法師並坐華臺光暉絕世謂幹曰與我報諸弟子後皆生此幹志奉華嚴常依經作華藏觀及彌勒天宮觀至于疾甚目睛上視若有所見沙

門童真問之答曰向見青衣童子引至兜率天宮而天樂非久終墜輪迴蓮華藏是所圖也言終氣絕須臾復甦真問何所見幹曰見大水遍滿花如車輪而坐其上所願足矣言終而逝故云爾也講說則華梵通韻人天共遵洪水斷流神光入宇講說則下卽宋求那跋陁羅唐言功德賢中天竺人初學五明諸論靡不該通後崇佛法深入三藏進學大乘大乘師試令探取經匣卽得華嚴師嘉之令其講說元嘉十二年至廣州刺史車朗奏聞太祖遣使迎接南譙王義宣等並師事之集義學

撰述

華嚴經疏卷第十一

十一

十一

沙門七百餘衆譙王欲請講華嚴經以華言未通  
有懷愧歎卽朝夕禮餞虔請觀音以求冥應遂夢  
有人執劍持一人首來至其前曰何憂於是具陳  
上事卽刎却陁首便置新頭語令迴轉得無痛耶  
答曰不痛豁然便覺備悟華言遂講華嚴至數十  
遍餘如傳說人天共遵者卽魏勒邢摩提此言寶  
意中天竺人博文贍學通誦一億偈經尤明禪性  
以正始五年初至洛陽譯十地等論二十四卷意  
神理標峻慧悟絕倫領受華音妙窮清切帝每令  
講華嚴精義頴發嘗處高座忽有持笏執名者形

如大官云天帝來請法師講華嚴法事所資獨  
不能建講焚香維邢梵唄咸亦須之講席衆僧  
悉皆同見意熙怡微笑告衆辭訣奄然卒於法座  
都講等僧亦同時殯故云人天共遵洪水斷流者  
卽僧法順俗姓杜氏京兆杜陵人也操行高潔學  
無常師以華嚴爲業常居山將種葵地多蟲蟻乃  
巡疆定封蟲便外徙盡力耕墾一無所損三原縣  
人自生聾痘順乃召之與語應言便愈因詣南山  
屬橫渠汎溢止之斷流徐步而過將終之日普會  
有緣聲色不渝言終而逝葬樊川北原今全身塔

撰述

卷之二十一

十一

篇十一

在長安南華嚴寺事跡頗多別傳云是文殊化身  
神光入宇者卽藏和尚僧法藏字賢首俗姓康氏  
康居國人初賢首母夢異光而孕此爲一光及生  
而慕無上年十七辭親求法於太白山後慈親不  
念歸奉庭闈歷歲時能竭其力時儼法師於雲  
華寺講華嚴賢首至中夜忽見神光來燭庭宇賢  
首歎曰當有異人發弘大教及明乃遇儼和尚自  
是伏膺深入無盡此爲二度神光入宇又後於雲  
華寺講有光明現從口出須臾成益衆所知見又  
是神光正取言同卽第二節神光入宇取其講時

卽第三節語其生瑞兼第一節故云神光入宇餘  
如別傳

良以一文之妙攝義無遺故一偈之功能破地獄鹽  
掌之水尚拯生靈故讀誦思修功齊種智

良以一文之妙下第一明感應所以於中四句初  
上一句正辨所以以一文一偈攝義無遺極圓妙  
故故普賢菩薩告善財言我此法海中無有一文  
無有一句非是捨施轉輪王位而求得者非是捨  
施一切所有而求得者釋曰以是一切之一故  
稱性之一故故一偈之功下三句辨其功能亦是

撰述

感通之事初一偈之功能破地獄者纂靈記云京兆人姓王失其名本無戒行曾不修善因患致死被一人引至地獄地獄門前見一僧云是地藏菩薩乃教誦偈云若人欲了知三世一切佛應當如是說心造諸如來菩薩授經已謂之曰誦得此偈能排地獄苦其人誦已遂入見王王問此人有何功德答云唯受持一四句偈具如上說王遂放免當誦此偈時聲所至處受苦之人皆得解脫後三日方蘇憶持此偈向諸道俗說之叅驗偈文方知是華嚴經夜摩天宮無量菩薩雲集所說卽覺林

菩薩偈今經偈云若人欲了知三世一切佛應觀法界性一切唯心造大意是同意明地獄心造了心造佛地獄自空耳旣一偈之功能破地獄何況一卷一品一部之玄微願思此言勉共傳誦盥掌之水尚拯生靈者卽僧伽彌多羅本師子國第三果人也麟德初來儀震旦高宗大帝甚加尊重處於禁中歲餘供養多羅請尋聖迹往清涼山禮敬文殊因出至西太原寺時屬諸僧轉華嚴經乃問曰此是何經答是華嚴多羅肅然改容曰不知此處亦有是經耶合掌歡喜讚歎久之曰此大方廣

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

擴述

釋名卷之二十六

十一

薦十

功德難思西國相傳有人讀此經以水盥掌水霑蟲蟻而捨命者皆得生天何況受持讀誦觀察思惟者歟故云爾也。讀誦思修功齊種智者上辨盥掌之水今明讀誦思修功至齊佛卽十地經解脫月問也初金剛藏云佛子此集一切種一切智功德菩薩法門品若諸衆生不種善根不可得聞解脫月菩薩言聞此法門得幾所福金剛藏菩薩言如一切智所集福德聞此法門福德如是何以故非不聞此功德法門而能信解受持讀誦何況精進如說修行是故當知要得聞此集一切智功德

法門乃能信解受持修習然後至於一切智地釋曰聞尚齊於種智何況讀誦思修不可量也經雖舉聞爲顯勝故意通思修故疏云讀誦思修功齊種智耳

宿生何幸感遇斯文其事跡昭彰備於記傳

宿生何幸下第三感慶逢遇可知餘諸感通具於傳記上來所引粗舉數條耳傳譯感通竟

大方廣佛華嚴經疏演義鈔卷第二十六

音釋

兌於貢切  
大覺之基也  
耻切綴  
基也知衛切  
岌思俊切  
岌禪也  
闔於檢切  
宦切宦

撰述

人輅洛故切  
大車也京切勅

渠敵之人

休寧居士金時順室黃氏男繼正繼美繼善媳  
汪氏朱氏吳氏女五弟寶貝寶弟轉繼義繼英  
繼昌葉氏祈保家門道泰老幼亨通喜助刻  
大方廣佛華嚴經疏演義鈔第共卷計字七千  
五百六十八箇該銀三兩七錢八分  
銀山釋海亮對上元王自謙書漂水陳秉達刻  
萬曆丙辰歲仲春月徑山化城識

# 大方廣佛華嚴經疏演義鈔卷第二十七

清涼山大華嚴寺沙門澄觀撰述

## 第九總釋名題中先解經題後明品稱

### 第九總釋經題中初總標章

今初總題包於別義該難思之法門無名之中強以十門分別

今初總題下別釋於中一先釋總題中三初標舉一通顯得名二對辨開合三具彰義類四別釋得名五展演無窮六卷攝相盡七展卷無礙八以義圓收九攝在一心十泯同平等

撰述

## 一一通顯下列章名

今初諸經得名有其多種或以人爲目或以法爲名人有請說等殊法有法喻等別或體或用或果或因乍複乍單其類繁廣

三今初諸經下別釋於初章中有二先總舉諸經體式二別明今經前中或以人爲目或以法爲名者總說也以人爲目多辨法之所由以法爲名乃略經之大體人有請說等殊下別釋人中舉其二類等取所爲所說言請者一從請人得名如思益梵天所問經賢護經等二就能說人如無盡意菩

薩經等三依所爲人如須達優填王等四依所說人如金色童子經等法有法喻等別者所言等者等取法中有多義故法之多義次下當說喻者如大雲經大寶積經等或體或用或果或因者卽法中別義也體者如般若經等用者如神足經等果者如涅槃經等因復多義一者因行如正恭敬經等二者因位如十住經等乍複乍單者複中畧有四雙一法喻雙題如妙法蓮華經等二人法雙舉如勝天王般若經等三體用雙明如十住斷結經等四因果雙舉如漸備一切智德經等言乍單者

通上諸義謂法單喻單體單用單因單果單等言其類繁廣者卽上所明已是繁廣更有從所說時爲名如時非時經或從所說處爲名如密嚴經等結上收餘故云其類繁廣並非正要故疏略言今經受稱亦多種不同一從數彰名如梁攝論第十勝相中云百千經者華嚴經有十萬頌是也二從喻受名如涅槃及觀佛二昧經詔此經爲雜華經以萬行文雜緣起集成故三從法彰名如智論釋囑累品詔此經爲不思議解脫經四從義用受名如下離世間品及出現品各有十名者是

今經受稱下第二別明今經得名於中復二先舉異名後彰今稱前中四義一數二喻三法四義用並可知言梁攝論第十勝相者論曰謂依大乘諸佛世尊有十相殊勝殊勝語一者所知依殊勝殊勝語二者所知相殊勝殊勝語三者人所知相殊勝殊勝語四者彼入因果殊勝殊勝語五者彼因果修差别殊勝殊勝語六者卽於如是修差别中增上戒殊勝殊勝語七者卽於此中增上心殊勝殊勝語八者卽於此中增上慧殊勝殊勝語九者彼果斷殊勝殊勝語十者彼果智殊勝殊勝語由

8

0 1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99 100

卷之三

皇清詞賦注解卷二十一

三

此所說諸佛世尊契經諸句顯於大乘真是佛語  
今當第十相中言如下離世間品及出現品各有  
十名者離世間品十名經云佛子此一切菩薩功  
德行處一決定義華二普入一切法三普生一切  
智四超諸世間五離二乘道六不與一切諸衆生  
共七悉能照了一切法門八增長衆生出世善根  
九離世間法門品十應尊重應聽受應誦持應思  
惟應願樂應修行若能如是當知是人疾得阿耨  
多羅三藐三菩提言出現品十名者經云佛子此  
法門名爲如來祕密之處名一切世間所不能知

名入如來印名開大智門名示現如來種性名成就一切菩薩名一切世間所不能壞名一向隨順如來境界名能淨一切諸衆生界名演說如來根本實性不思議究竟法卽十名也

依今梵本云摩訶毘佛略勃陁健拏驃訶修多羅此云大方廣佛雜華嚴飾經今略雜飾字耳  
依今梵本下第二彰今日也於中三初正釋今名二揀前說三結成今義疏中一時併舉梵言一時譯就此語若別對者摩訶言大毘佛略云方廣勃陁云覺者卽是佛字佛字略存梵音故健拏云雜

華驃訶云嚴飾修多羅云經

前三異名義多總略二品十目多從別名又局當品  
前二異名下二揀前說言二品十目多從別名者  
不得總該不可具舉故又局當品者出現十名局  
於出現離世間十名局離世間豈得通爲一部總  
稱

故今譯者具以六字爲名則人法雙題法喻齊舉具  
體具用有果有因理盡義圓故標經首

故今譯者下結成今義明其具足前通辨類中卽  
是複義而具前四對之複故理盡義圓也

二對辨開合者題中七字有十事五對一敎義相對  
謂經之一字是能詮教大等六字是所詮義二就義  
中法喻一對謂大等是法華嚴是喻三就法中人法  
一對謂大方廣是所證無障礙法佛是能證之人亦  
名境智一對四就法中揀持一對大之一字是揀方  
廣是持卽揀大異小揀實異權揀果異因亦是體用  
一對大方是體大方無隅故廣卽是用五就人中借  
下華字以喻其因卽因果一對佛是果故是以單用  
華字則但舉喻因若合以華嚴則亦喻上之四字至  
下當明

大方是體大方無隅故者然大方廣二字總有三義一三字別釋配體相用如下廣說二方廣兩字合之爲用對上大字爲體三者大方爲體方字屬大便成無方言大方無隅者語出老子德經云上德若谷大白若辱廣德若不足建德若偷質真若渝大方無隅大器晚成大音希聲大象無形道隱無名夫唯道善貸且成意云小則有其圭角大則絕其方隅隅卽角也借其言用今大方卽法界等於虛空何有隅角言若合以華嚴則亦喻上之四字者卽是上文二就義中法喻一對以嚴通能所

華爲能嚴大方廣卽所嚴佛是嚴成之果又以因望果佛亦所嚴故華嚴兩字通喻大方廣佛之四字也言至下當明者卽釋嚴中

三具彰義類者謂大等七字義皆無量並略以十義釋之

### 初明大十義者

一體大謂若相若用等皆同真性而常遍故卽是大字涅槃云所言大者名之爲常此明體不變易如人最長故名爲大又云大者其性廣博猶如虛空此明體遍

撰述

聖經全書卷之三十一

七

卷八

一體大下別釋十大初體大中二先總後別以二義釋大而云卽經大字者古人亦各十義釋其七字不知以七字互相釋今明大義則七字皆大方則七字皆方廣則七字皆廣佛則七字皆佛等故以體大配於大字若總舉七字大者體也方者相也廣者用也佛者果也華者因也嚴者智也經者教也涅槃云所言大者下證上二義先證常義卽涅槃第三名字功德品云佛告迦葉是經名爲大般涅槃上語亦善中語亦善下語亦善義味深邃其文亦善純備具足清淨梵行金剛寶藏滿足無缺汝今善聽我今當說善男子所言大者名之爲常如八大河悉歸大海此經如是降伏一切諸結煩惱及諸魔性然後要於大般涅槃放捨身命是故名曰大般涅槃釋曰彼經具釋大般涅槃今但取其大字約體不變故名爲常以性出自古非造成故故生公序云夫真理自然悟亦冥符真則無差悟豈容易不易之體爲湛然常照但從迷乖之事未在我苟能涉求便返迷歸極歸極得本而似始起始則必終常以之昧若尋其趣乃是我始會之非照今有照不在今卽是莫先爲大旣云大矣

撰述

卷之三十一

七

七

所以稱常常必滅累復曰般泥洹也正順今意涅槃第二十五亦云所言大者名不可思議以體絕常境故言如人最長者謂無一法先法界故老子云有物混成先天地生寂寥兮寥兮獨立而不改周行而不殆可以爲天下母吾不知其名字之曰道強爲之名曰大釋曰彼以虛無爲道理異釋門言可證此又云大者其性廣博下二證上遍義卽涅槃第五如來性品南經四相品文云佛造迦葉所言大者其性廣博猶如有人壽命無量名大丈夫是人若能安住正法名人中勝故遠公分此一

文成二種大一廣故名大二勝故名大今但取廣遍之義義便引來彼更多故名大如藏多珍寶復有高故名大如大高山難至其頂復有深故名大猶如大海卽上不思議義今以多卽約用高卽約果故但用二義於常義中已含深勝如人最長卽是勝故又言猶如虛空復是別文第二十三云又不逼者譬如虛空解脫亦爾彼虛空者喻真解脫真解脫者卽是涅槃

二者相大謂恒沙性德無不具故互相卽入微細重等具十玄門皆其相故卽經方字方者法也

二相大等者有一意恒沙性德與起信同互相卽入下卽顯圓教事事無礙亦性具矣然遠公釋涅槃亦明體相用體約性淨涅槃相約方便淨涅槃用約應化涅槃此通因果今明所證法中有三故不同彼

三用大謂業用周普如體遍故卽經廣字

三用大等者文中三初正釋用大

涅槃云又大者能建大義卽是約用

一涅槃云又大下引證卽第四經南經四相品以迦葉復問如佛言曰我已久渡煩惱大海若佛已

渡煩惱海者何緣復納耶輸陀羅生羅睺羅以是因緣當知如來未渡煩惱諸結大海唯願如來說其因緣佛告迦葉汝不應言如來久渡煩惱大海何緣復納耶輸陀羅生羅睺羅以是因緣如來未渡煩惱大海善男子是大涅槃能建大義汝等今當至心諦聽廣爲人說莫生驚疑若有菩薩摩訶薩住大涅槃須彌山王如是高廣悉能取令人於芥子其諸衆生依須彌者亦不迫迮無往來想如本無異唯應度者見是菩薩以須彌山內芥子中復還安止本所住處下廣說作用竟結云善男子

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

是菩薩摩訶薩住大涅槃則能示現種種無量神通變化是故名曰大般涅槃是菩薩摩訶薩所可示現如是無量神通變化一切衆生無能測量汝今云何能知如來習近姪欲生羅睺羅善男子我已久住是大涅槃種種示現神通變化彼經卽約果用今意明是卽體之用本有之用下佛果有相用者皆由本自有故

良以涅槃無廣廣與大同故以廣釋大方廣無大大與廣合故以大釋廣今經具有故各配之

三良以涅槃下釋妨謂有問言涅槃此義本釋大

字何得以廣配之故今通云涅槃但言大般涅槃無有廣字故大字含廣故以能建大義廣家之義以釋大字今經大字對體廣字對用故自別釋因便便通方廣之經謂十二分教中有方廣經無有大字而用大字釋方廣言卽如下合釋方廣云宣說廣大甚深法故能生無量廣大果故皆以大釋廣也

四果大謂智斷依正普周法界故卽經佛字五因大謂發菩提心起解行願證精勤匪解成諸位故卽經華字

撰述

五因大等者謂發菩提心卽十信發心起解卽十住行卽十行願卽十向證卽十地精勤匪懈通策於前以成諸位所以廣說因中差別者欲收攝論七大性故次文當知

六智大謂大智爲主運諸萬行遍嚴一切無所遺故卽經嚴字

七者教大謂一文一句無不結通遍於一切十方三際重重無盡故卽是經字

八者義大謂所詮法盡第法界乃至帝網無所遺故卽總是六字

九者境大以上法門普以無盡衆生爲化境故十者業大謂盡三際時窮法界處常將此法利益衆生無休息故

如攝大乘等七種大性不離於此

如攝大乘等者二結會他文而言等者等取雜集瑜伽般若大同小異攝大乘第一釋大乘云若廣釋者七種大性共相應故不廣說之瑜伽四十六云一法大性二發心大性三勝解大性四增上意樂大性五資糧大性六時大性七圓證大性雜集十一說七大性者一者境大性二者行大性三智

撰述

釋名

十一

卷八

四精進五方便善巧六證得七業彼論云何等名爲七種大性一者境大性以菩薩道緣百千等無量諸經廣大教法爲境界故二行大性正行一切自利利他廣大行故三智大性了知廣大補特伽羅法無我故四精進大性於三大劫阿僧祇耶方便勤修無量百千難行行故五方便善巧大性不住生死及涅槃故六證得大性證得如來諸力無畏不共佛法等無量無數大功德故七業大性窮生死際示現一切成菩提等建立廣大諸佛事故若般若無著論七大性者一法二心三信解四淨

心五資糧六時七果此與瑜伽大同若與對法會者一法卽雜集境大性緣大教法而爲境故二心卽是行大性卽由淨心行二利行故三信解卽智大性信解與智於境印持於境決斷大意同故四淨心卽精進由精進練磨令心淨故五資糧卽方便善巧由大悲般若而爲方便與無住涅槃爲資糧故六時卽第七業大性窮生死際盡未來時建立佛事而爲業故七果卽雜集第六證得大性謂證佛功德而爲果故雜集依體起用得果不捨因證居其先般若論中約時通因果故果居時後餘

卷之三

卷之三

三

十一

卷之三

08  
1  
2  
3  
4  
5  
6  
7  
8  
9  
06  
1  
2  
3  
4  
5  
6  
7  
8  
9  
00  
1  
2  
3  
4  
5  
6  
7  
8  
9

之次第二論意同謂依教起行達甚深理精進長時不滯二邊證大勝果窮生死際建立佛事故名爲大雜集卽是對法瑜伽大同般若今疏體大卽第三智大之中所知無我之理二相大亦所知攝亦法大性卽境攝故三用大卽方便大而是卽體之用亦境攝故四果大全同五因大攝其五大性一發菩提心卽是心大二起解者攝勝解大三行願證並是行大是十地因證非果證故四精勤匪懈卽淨心精進大五成就諸位卽攝資糧大六智大全同而義小與通了性相因果等故七教大卽

是境法大性八義通前六但除教故九名同雜集  
初一而義同時大及與方便善巧十同第六而具  
舍二論時業二名爲對題中七字攝十故有開合  
及次不同而義無違故云七種大性不離於此或  
相大一種二論略無理亦無失又通約十大教旨

二方十義者方者法也卽前十大皆名爲法謂體法相法等

謂體法相法等者等取下八謂用法果法等法是  
軌持能持自性故十皆法

三廣十義者廣者多也用多繁興包無不盡故則前十皆多卽明一遍一切名之爲大一攝一切名之爲廣亦可反此此約離釋

三廣十義等者疏文有二先離釋廣字

若合釋方廣二字亦有十義一廣依義謂言教繁廣爲生依故二廣說義宣說廣大甚深法故三廣破義破一切障無有餘故四廣超義無有諸法能比類故五廣治義具攝無邊對治之法爲能治故六廣攝義通攝無邊異類法故七廣德義具攝二嚴諸勝德故八廣生義能生無量廣大果海故九廣絕義非是心

識稱量所能知故十廣知義具足種智破邪見障無有餘故

後合釋順諸經論釋方廣經於中二先正釋十義也

此之十義前四卽雜集第十一中四義後六卽入大乘論第一中六義

後此之十義下結示本源言前四卽雜集第十一中四義者彼論云方廣者謂菩薩藏相應言說如名方廣亦名廣破亦名無比爲何義故名爲方廣一切有情利益安樂所依處故宣說廣大甚深法

故爲何義故名爲廣破以能廣破一切障故爲何義故名爲無比無有諸法能比類故此方廣等皆是大乘義差別名釋曰此論標以三名釋成四義以方廣中有二義故次第無差言後六卽入大乘論第一中六義者彼論云毘佛略者是摩訶衍何以故名毘佛略經爲諸衆生說對治法名毘佛畧亦有衆多乘故名毘佛略亦以多莊嚴具故名毘佛略亦能出生無量大果報故名毘佛略非是稱量所能知故名毘佛略斷除一切諸邪見故名毘佛略釋曰次第與疏全同但以毗佛略隔之以成

六義然其第一說對治法似雜集論第三廣破集約所破此約能破故亦不同五非是稱量似於集論第四無比集約法不可類此約心不能知故並不同而刊定記云以對治與破障是同乃除入論第一加集論菩薩藏相應言說爲五者殊失論意以菩薩藏相應言說是總揀小故總揀已竟方標三名釋成四義耳若欲以集論之四攝入論之六者一卽第二廣攝二卽三四廣德廣生皆深法故三卽一六對治破見皆破義故四卽第五廣超廣絕大意同故今取小異並開爲十則二論不同謂

撰述

華嚴經疏卷第十一

十一

萬八

集論一約言教入論二約所攝集論二約通辨甚深入論別開三約二嚴通因四約能生唯果集論三約合明對治入論別分一治煩惱六破智障雜集第四似入論第五已如前會故成十義然爲順二論之次故不依題之次若欲配經者一廣絕是大體絕衆相不思議故二廣超是方妙法無類故三廣攝是廣攝無邊故四廣知是佛具種智故五廣破六廣治七廣生三皆華字並是因故八廣德是嚴具二嚴故九廣依是經依言教故十廣說是義說甚深法是所說故卽總上六字亦可通七

四解佛十義者卽是十佛大卽法界佛方卽本性佛廣卽涅槃佛及隨樂佛佛卽成正覺佛華卽願佛及三昧佛嚴卽業報佛經卽住持佛總不離心七字皆是心佛釋十佛義如八地中及離世間品辨

四解佛十義等者文有三解初依本經言如八地中及離世間品辨者上教緣中已廣其義今更略明八地明十身卽離世間品十佛八地云知如來身有菩提身願身化身力持身相好莊嚴身威勢身意生身福德身法身智身離世間品五十三中說十種佛所謂成正覺佛願佛業報佛住持佛涅

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

槃佛法界佛心佛三昧佛本性佛隨樂佛十佛卽是十身若欲會者正覺是菩提願佛卽願身業報佛卽相好莊嚴身住持佛卽力持身涅槃佛卽化身法界佛卽法身心佛卽威勢身三昧佛卽福德身本性佛卽智身隨樂佛卽意生身今疏爲順經題故不依彼二經之次言大卽法界佛者大卽法界體故方卽是本性智故廣卽涅槃佛者化周遍故亦隨樂佛者隨自他意無不生故佛是梵言此卽覺故華卽願佛及三昧佛者並是因故嚴謂萬行之因嚴成相好莊嚴身故經敎住持法不墜

故總不離心卽心佛者是威勢身心伏勝故

又佛地論第一說佛亦具十義謂具一切智一切種智離煩惱障及所知障於一切法一切種相能自開覺亦能開覺一切有情如睡夢覺如蓮花開故名爲佛

又佛地論第一下第二引佛地論論無別釋今當略辨攝此十句以爲五對一能證智二所斷障三所證理四所成益五顯覺相前四法說後一喻明然此五對一一相屬一能證智卽具一切智是根本智一切種智是後得智二所斷中以一切智斷

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

煩惱障一切種智斷所知障種類而知故三所證  
理中一切法者卽真諦法也一切種相者俗諦法  
也以一切智總相觀法之性以一切種智別相觀  
法之相由證法性除煩惱障由達法相斷所知障  
四所成益者一則自利二者利他上之三對俱通  
二利若取別義以一切智自證法性便是自覺以  
一切種智覺法之相故能覺他五顯覺相中如睡  
夢覺者以一切智覺法之性頓破無明煩惱睡故  
如蓮華開者以於種智覺法之相開悟法門如於  
華開得見蓮故前卽覺察後卽覺悟亦可前是覺

悟後爲覺察此五無缺方稱覺滿名曰妙覺離覺  
所覺而盡覺故上之解釋未見經論理必應然  
又真諦引真實論亦有十義恐繁不引

又真諦引不引者卽真諦三藏七事記中引言十  
義者謂覺勝天鼓一不由他悟二斷二無知三已  
過睡夢四譬如蓮華五性淨無染六具足三義七  
具足三德八具三寶性九自知令他知十初言覺  
勝天鼓者天鼓有四德今並過之一能覺諸天賊  
來云賊來賊去云賊去佛卽不爾能令衆生覺三  
煩惱若生知生若滅知滅二天鼓能護天衆能破

修羅佛亦不爾能救三苦能破四魔三天鼓能令  
諸天受五欲樂佛亦不爾能令衆生受出世樂四  
天鼓能令諸天生貪著心佛亦不爾能令衆生生  
出世心具此四過故云覺勝天鼓二不由他悟者  
無師自然智故三斷一無知者即是煩惱無知所  
知無知四已過睡夢者凡夫睡而不夢唯煩惱故  
二乘亦睡亦夢以有無明及妄智故佛不睡不夢  
無有無明捨妄解故五譬如蓮花者日光照觸蓮  
華卽開十地行成佛智自發六性淨無染者因時  
雖有煩惱五義不染一佛無相故譬如煙霧不能  
染空二是對治故譬如鎔鐵不停蚊蚋三非處所  
故譬如大石不能住空四無轉異故譬如白玉涅  
而不綯五妄不染真譬如幻刀不能斫石因時有  
惑尚不能染果時惑盡豈當有染七具足三義者  
卽是三佛一假名佛謂六神通二寂靜佛謂惑不  
生三真實佛謂卽真如八具足三德者謂摩訶般  
若解脫法身九具三寶性者謂同體三寶十自知  
令他知者卽是二利謂佛智慧力照真如境名曰  
自知復以慈悲力說十二部經令他知也釋曰以  
此十義有同佛地故恐繁文

撰述

五釋華十義者一含實義表於法界含性德故二光淨義本智明顯故三微妙義一一諸行同法界故四適悅義順物機故五因果義行爲生因起正覺故六端正義行與願俱無所缺故七無染義二一行門三昧俱故八巧成義所修德業善巧成故九芬馥義衆德住持流聲彌遠故十開敷義衆行敷榮令心開覺故

五十華十義下疏文有一第一別釋十華第二總相料揀前中卽如次配於十佛如一含實義表法界佛含性德故爲對十佛故爲此次亦可配於十

度之因而不依次爲順題故一卽般若二卽智度三卽方便四卽尸羅五卽忍辱六卽是願七卽禪定八卽是檀九卽是力十卽精進此意如下普眼長者以十度因成十身果故彼經云爲欲令其具佛相好稱揚讚歎檀波羅密卽成相好莊嚴身故一二云爲欲令其得佛淨身悉能遍至一切處故稱揚讚歎尸波羅密卽意生身三爲欲令其得佛清淨不思議身稱揚讚歎忍波羅密卽菩提身四爲欲令其獲於如來無能勝身稱揚讚歎精進波羅密卽威勢身五爲欲令其得於清淨無與等身稱

撰述

書寫於清嘉慶二十二年

三

萬

揚讚歎禪波羅蜜卽福德身六爲欲令其顯現如來清淨法身稱揚讚歎般若波羅蜜卽是法身七爲欲令其現佛世尊清淨色身稱揚讚歎方便波羅蜜卽是化身八爲欲令其爲諸衆生住一切劫稱揚讚歎願波羅蜜卽是願身九爲欲令其現清淨身悉過一切諸佛刹土稱揚讚歎力波羅蜜卽力持身十爲欲令其現清淨身隨衆生心悉使歡喜稱揚讚歎智波羅蜜卽是智身末云爲欲令其獲於究竟淨妙之身稱揚讚歎永離一切諸不善法卽圓淨十度八萬四千波羅蜜門萬德頓具該

上十華是故梵本名爲雜華上約相顯別配十度若約圓融一一行門皆具十義可以意得

### 大方廣佛華嚴經疏演義鈔卷第二十七

休寧奉佛弟子金彥明施贊刻此  
 大方廣佛華嚴經疏演義鈔二十七卷祈保家  
 門道奉老幼亨通計字七千六百八十箇該銀  
 銀三兩八錢四分  
 銀山釋海亮對上元王自謙書陶文汜刻  
 萬曆丙辰歲仲春月徑山化城識

80

1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

撰述

高僧傳記卷之二十一

十一

蕉川

大方廣佛華嚴經疏演義鈔卷第二十八

清涼山大華嚴寺沙門澄觀述

然華有一種一草木華喻萬行因然或與果俱或不與俱二嚴身華通金玉等喻於神通衆相等唯與果俱前十義中一五九十局於草木餘通二華

然華有二種下第二總相料揀其引果華亦喻生因其嚴身華亦喻了因此二無礙言或與果俱者如蓮華等因該果海果徹因源圓融行故或不與俱者杏柰等華因果區分行布行位不相雜故此二無礙是此中華言神通衆相等者淨行品云若

見華開當願衆生神通等法如華開敷若見樹華  
當願衆生衆相如華具三十二神通衆相果上用  
故云與果俱然神通雖乃通因且就金玉之華與

六釋嚴者卽上十華同嚴一佛爲嚴不同亦是十義  
六釋嚴者下疏文有三十八義且爲三節初十總  
釋次十別釋後十八句互嚴今初言爲嚴不同者  
如以十寶嚴一金佛一真珠嚴二珊瑚嚴等一佛  
十嚴歷於十佛便成百嚴約圓融修故

又上十華如次嚴前十佛卽是十義而總別無礙

又上十華等者第二別釋義同一度成一佛故總別無礙者總融上二行布圓融二無礙故

更有十義一用因嚴果以成人故是佛華嚴果由因得故二以果嚴因以顯勝成果之後令一一因行皆無際故三以人嚴法而顯用謂佛曠劫修因方顯法之體用故四以法嚴人以顯圓若不得法之體用因果不能圓妙故五以體嚴用以令周謂用不得體不周遍故六以用嚴體而知本若無大用不顯體本之廣故七以體嚴相而知妙謂相若有體便即入重重故八以相嚴體以明玄體若無相不顯體深玄故九

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

以義嚴教超言念由所詮難思能詮言離故十諸因互嚴以融攝如禪非智無以窮其寂智非禪無以深其照等

更有十義下第三約互嚴說於中有二一別約十  
義五對以互相嚴二收成四句以顯互嚴今初十  
義在文可知然亦是於別釋得名中釋名之義若  
約相融皆持業釋若約當相皆依主釋如第一用  
因嚴果是華嚴之佛故二卽佛之華故三卽佛華  
嚴之大方廣四卽大方廣之佛華嚴五卽大之方  
廣六卽方廣之大七卽大之方八卽方之大九卽

大方廣佛華嚴之經十諸因互嚴乃含多義謂施  
之戒戒之施定之慧慧之定等前四成對後一非  
對但可大等嚴經不可以經嚴大等故不成對又  
爲欲顯因互嚴故言禪非智無以窮其寂等者舉  
一爲式餘可類取謂禪無智但是事定若得智慧  
觀於心性爲上定故智不得禪乃爲散善分別慧  
故慧若有定如密室燈寂而能照離動分別成實  
慧故所言等者等餘萬行如施不得戒非是真施  
破戒行施非真福故戒不得施亦非真戒慳貪不  
息非真戒故不捨財法正犯戒故餘並可思

又上來互嚴皆有相資相卽四句今且約理行互嚴以明

又上來互嚴下第二收成四句於中二先總標後初相資四句下別釋

初相資四句者一理由修顯故以行華嚴理二行從理發則以理華嚴行梁攝論云無不從此法界流無不還證此法身故

無不從此法界流者卽從本起末證行從理發無不還證此法身者攝末歸本證理由修顯

三理行俱融不二而二

非真流之行無以契真非起行之真不從行顯良以體融行而因圓行該真而果滿是故標爲佛華嚴也

三理行俱融不二而二下此句有三節一此上正釋以互融故不二不壞兩相故而二非真流之行下第二反成上義上句反成行融理次非起行行之真不從行顯者反成上理融行良以體融行下三正成前義言體融行而因圓者行卽是因以體融行故因行圓滿行該真而果滿者正成上行融理也行不該真何由得果耶

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

四理行俱泯二而不二以理之行故非行行之理故非理是則能所兩亡超情絕想非嚴非不嚴是謂華嚴

四理行俱泯此句易了然上互融行融理而行在理融行而理存故不二而二今理行相奪故云二而不二

相卽四句理行全收准思可見則法喻交映昭然有在

相卽四句下但例前釋若力用交徹卽說相資有體無體卽言相卽若具作者一者唯理無不真故絕也言法喻交映者以華嚴像爲喻喻以因行嚴佛故

七釋經十義雜心五義已見上文佛地論有二義一貫穿所說二攝持所化卽雜心結鬟一義合之應除結鬟開成六義依此方訓復有四義一常二法並如前辨三經義卽衆生逕路四典義令見聞正故寶雲經中亦有十義恐繁不引

七釋經十義雜心五義已見上文者卽藏攝中謂

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

一出生二顯示三湧泉四繩墨五結鬢餘則可知  
第四別釋得名者先得後釋先得名者大以當體受  
名常遍爲義常卽堅無初際遍則橫該無外方以就  
法得名軌持爲義雙持體相軌生物解故廣以從用  
得名包博爲義包則廣容博則廣遍佛以就人得名  
覺照爲義照則朗萬法之幽邃覺則悟大夜之重昏  
華以從喻得名感果嚴身爲義感果則萬行圓成嚴  
身則衆德備體嚴以功用受名資莊爲義謂資廣大  
之體用莊真應之佛身經以能詮得名攝持爲義持  
性相之無盡攝衆生之無邊

第四別釋得名等者此中得名各取前七字別義  
例皆二義釋之類前可知

後釋名者一就法中體用相對大之方廣謂有體之  
相用故方廣之大有相用之體故皆依主釋若相卽  
者卽持業釋二就人中果行相望佛之華非因位之  
行故華之佛非餘行之佛故亦通相卽三以人法相  
對大方廣之佛華嚴非小權乘之佛等故佛華嚴之  
大方廣非因位所得法故相卽可知四教義相對亦  
通二釋敎望於義及前人望於法兼通有財並可思  
准

撰述

華嚴經疏卷第十八

大

蘭丸

此中釋名卽前對辨開合中五對之中但除法喻一對用餘四對以法喻一對華之一字已屬因門故略無之四對之中望前有二異一前則從寬至狹故先明教義今從狹至寬故先明體用又前從下釋上故先明教義今從上釋下故後明教義而前五對中後明人中因果者以因是華字借喻中華故在後明前從寬至狹義已盡故四教義相對一通二釋者以易知故不出若具釋者應云大方廣佛華嚴之經揀非涅槃等經故經之大方廣佛華嚴揀非論中之所明故而四對皆具二釋者約大方廣故故云可思

行布則依主約圓融則持業教望於義下謂四對之中後二對中通於三釋謂經中有大方廣佛華嚴故如對法藏論全取他名以目經故佛華嚴有大方廣故故云可思

第五展演無窮者謂初於最清淨法界開爲理智兩門卽涅槃菩提之異

第五展演無窮等者然此下四門皆關脉中意此門中彼有二義一展一爲多二類結成本類結成本不異前第七部類品會中本部故此不明又此展中並皆略示而有十重一展法界爲理智二門

理卽大方廣是所證法界爲涅槃智卽佛華嚴爲能證菩提雖有六字但是二法

又理開體用卽大方廣智開因果卽佛華嚴總連合成詮卽題中經字

二又展理智爲題目卽大是體性包含方廣是業用周遍故云理開體用佛卽是果華嚴是因故云智開因果

又展此目以爲初會初會總故十海是理十智是智十海之中含於體用十智之中亦含因果又華藏世界及遮那遍中卽依正二果皆是佛字大威光太子略示因華彼一所證所觀卽大方廣卽總成一會所信因果體用

三又展此目爲初會於中自有二重一但世界成就品初牒問許說中已具題目二通就一會以示品目言十海之中含於體用者卽初也十海者一切世界海二一切衆生海三一切諸佛海四一切法界海五一切衆生業海六一切衆生根欲海七一切諸佛法輪海八一切三世海九一切如來願力海十一切如來神變海七九與十此三是用餘皆是體此十本具皆是所證故名爲理十之相

差是事法界十之真性是理法界理事相融並爲所證之理故云十海是理言智舍因果者上言十智者知上十海卽是十智而名小開合經云佛子諸佛世尊知一切世界海成壞清淨智不可思議一知一切衆生業海智不可思議二知一切法界安立海智三說一切無邊佛海智四入一切欲解根海智五一念普知一切三世海智六顯示一切如來無量願海智七示現一切佛神變海智八轉法輪智九建立演說海智十此上皆有不可思議之言唯願海是因餘皆是果若約所知一三四八

九十皆果餘四爲因三世通因果又華藏世界下二通就一會以示品目則題目該於一會言遮那遍中者非唯遍於華藏亦遍法界以世界成就品亦說毘盧遍嚴淨故彼偈云所說無邊衆刹海毘盧遮那悉嚴淨世尊境界不思議智慧神通亦如是況第六經云毘盧遮那佛願力周法界一切國土中恒轉無上輪第五經云佛所莊嚴廣大刹等於一切微塵數清淨佛子悉滿中雨不思議最妙法又華藏品云華藏世界海法界等無別又一一塵中見法界皆普遍義故遮那遍中之言亦已攝

1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9

於世界成就品矣言彼二所證所觀卽大方廣者  
果證法界大方廣因觀法界大方廣

又展此會以成後八四周因果各因是華果卽是佛  
其所修所證之體用卽大方廣

又展此會以成後八者卽第四節展成一部

又展此九會周遍十方謂如第二會光明覺品辨一  
類之會已遍十方餘會亦爾

又展此九會周遍十方者卽第五節言如第二會  
光明覺品者舉一會文以爲體式謂光明覺品總  
有二十六節放光最後遍周法界虛空界皆云彼  
一一世界皆有百億闍浮提乃至百億色究竟天  
其中所有悉皆明現彼一一闍浮提中悉見如來  
坐蓮華藏師子之座十佛刹微塵數菩薩所共圍  
遶悉以佛神力故十方各有一大菩薩一一各與  
十佛刹微塵數諸菩薩俱來詣佛所等釋曰此卽  
遍十方文旣同百億闍浮提等故是同類世界言  
餘會亦爾者下之七會及第一會皆遍十方如第  
二會故諸會未多結周遍

又展此諸會各有主伴如說十住十方菩薩證云十  
方國土皆說此法則前遍法界之會各有重重主伴

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

又展此諸會各有主伴者卽第六節也上來但明主經之遍今辨伴經之遍而引第三會文則前述法界之會各有重重主伴者此言例上遍法界之九會也

乃至遍於塵刹

乃至遍於塵刹者第七節也上但遍國今則遍塵異類界等

異類界等者卽第八第九節也上來七節但遍同類八遍異類樹形等刹而疏言等者等取第九節異類刹塵謂異類之刹亦以塵成塵亦有刹於中

說經尤多矣

無盡時會

無盡時會者卽第十節謂上同類異類若刹若塵皆悉重重猶如帝網時會與法皆無盡也

皆不出大方廣佛華嚴清淨法界

皆不出等者舉題總收也清淨法界者舉本總收明從一法界無名無相之中展成無盡

第六卷攝相盡謂從後漸卷乃至不出九會九會不離初會初會不離總題總題不出理智非理不智故理外無智非智不理故智外無理則理智不二亦攝

智從理離體無用攝用歸體體性自離故體卽非體  
本來清淨強名之清淨法界是以極從無盡乃至一  
字無字皆攝華嚴性海無有遺餘

第六卷攝相盡者相字去聲乃至無字法界之相  
亦不存故然但解上展則解此卷故云從後漸卷  
言乃至不出九會者乃至二字略後五重不出九  
會是第四節耳若具應云一卷無盡時處歸異類  
界塵二卷異類界塵歸異類界三卷異類界不出  
同類界塵四卷同類界塵不出同類刹主伴經五  
卷主伴不出主經結遍十方六卷遍十方不出九

會七歸初會八歸總題九歸理智十歸清淨法界  
非理不智下是第十節卷理智歸法界而有二意  
一者理智之中隨舉其一卽攝於二但成一味二  
者以智爲用以理爲體但攝智歸理不攝理歸智  
初攝二爲一唯一理字理體性離一亦不存故云  
無字又准前展亦合云總題不出體用因果因果  
雖殊不出一智體用雖異不出一理然後方融理  
智但不異前故略示耳若從六字倒收者攝教從  
義但有大方廣佛華嚴攝人從法但有大方廣攝  
用歸體不離於大古人云一言無不略盡殊說更

無異盈又大體性離言思斯絕唯證相應耳

第七展卷無礙者謂正前展時卽後常卷正後卷時卽前常展展時卽卷故無量無邊法門海一言演說盡無餘卷時卽展故如來於一語言中演說無邊契經海

第七展卷無礙者謂說有前後實在一時隨門不同故有三門耳疏無量無邊法門海卽展時也一言演說盡無餘卽卷時也如來於一語言中卽卷時也演說無邊契經海卽展時也

第八以義圓收者上來諸門或以七字攝盡如前已

### 辨

第八以義圓收者疏文有二先以法攝後以人攝前中又二先指前不出總題

或以教義攝盡或以理智攝盡或人法攝盡或解行證攝盡

後或以教義下重釋攝義疏文略舉若具說者應增數明謂或於無字中一字攝盡謂或教或義或性或心二或二字攝盡疏有三節亦更應言或法界字攝盡三或三字攝盡疏文有一義順後表三聖故亦應云入法界攝盡理行果攝盡從所詮故

四或四字攝盡謂教理行果教卽經字理卽大方廣行卽華嚴果卽佛也或敎義成處攝盡一謂文雖浩汗唯一教字卽題中經字二謂義雖無量但一緣起義攝卽題中大方廣也三成謂行解因果德相用等雖各緣起不同據其成立唯一成字攝盡卽題中佛華嚴也四處謂一切重重無盡同類異類重重塵刹唯一處字故總卷之義唯一性教唯一文成唯一念處唯一塵此一卽是一切一故或信解行證攝盡經有四分初會是信次六明解八約成行九唯證故如下當知五或五字攝盡謂

加一教字或理信解行證理是所信所解所行所證故或六字攝盡卽題中除經上之六字是所詮故或理信解行願證理卽所信等解行願三卽是三賢證通地上及極果故或七字攝盡卽全取一題一題通目無盡法故或八字攝盡卽法界緣起理實因果故或九字攝盡謂障礙法界緣起因果故或十字攝盡謂體相智用因果敎義及境業故或唯普賢文殊毘盧遮那三聖攝盡謂大方廣卽普賢普賢表所證法界故華嚴卽文殊文殊表能證故佛卽遮那具能所故

撰述

又大卽普賢普賢菩薩自體遍故方廣卽文殊文殊表卽體之智故華卽普賢普賢行故嚴卽文殊文殊以解起行故佛卽圓解行之普賢文殊證法界體用之普賢文殊成毘盧遮那光明遍照

或唯普賢文殊下第二以人攝也然有兩重先約人法對辨二聖後於人法中各有二聖佛字當中兩重總收可思

第九攝歸一心者上來諸門乃至無盡不離一心一心卽法界故起信云所言法者謂衆生心

心體卽大心之本智卽方廣觀心起行卽華嚴覺心

性相卽是佛覺非外來全同所覺故理智不殊理智形奪雙亾寂照則念念皆是華嚴性海

第九攝歸一心者於中二先指前總明謂上八門已是一心上說故云上來諸門不離一心而修行禪流皆欲棄文而修觀行故復接之以辨此門心體卽大下後正約觀心以釋謂心體離念離念相者等虛空界豈非大耶心之本智卽方廣者上大是卽智之寂方廣乃卽寂之智故云寂照運無涯之照卽心體相用三融爲所觀也觀心起行卽華嚴者觀體照而卽寂止也觀用寂而常照觀也一

撰述

華嚴經疏卷之二十一

十一

前九

心六度萬行皆起覺心性相卽是佛者一念相應之覺也故經云佛心豈有他正覺覺世間覺性無覺卽根本智覺相歷然卽後得智此二不二是無障礙智覺非外來全同所覺下上明安立六字今明卷攝相空此上融成一味此下互奪雙寂則一不爲一如斯觀行未曾一念不契華嚴

第十泯同平等者爲未了者令了自心若知觸物皆心方了心性故梵行品云知一切法卽心自性則成就慧身不由他悟然今法學之者多棄內而外求習禪之者好亾緣而內照並爲偏執俱滯二邊旣心境

如如則平等無礙

第十泯同平等者此一門總融前九前八法師所知第九禪師所尚故今會之於中三初法說二余曾瑩兩面鏡下喻明卽借帝網之喻以喻心境三見夫心境互照下合喻意唯一而文有四節余曾瑩兩面鏡鑑一盞燈置一尊容而重重交光佛佛無盡

第一節取兩鏡及燈合之一鏡喻境一鏡喻心燈喻本智但取明了之義  
見夫心境互照本智雙入心中悟無盡之境境上了

撰述

龍藏卷之二十八

十一

前九

難思之心心境重重智照斯在

言本智雙入者智性色性本無二故知一切法卽心自性故故此智性入心入境言心境重重者合兩鏡互照智照斯在者合一燈雙入是則以本智爲能照心境皆所照由斯本智令心境互融又卽心了境界之佛卽境見唯心如來心佛重重而本覺性一

又卽心了境界之佛下第二取兩鏡及一尊容以合尊容喻真佛故今人只解卽心卽佛是心作佛不知卽境卽佛是境作佛今明以如爲佛心境皆入

如心如卽佛境如焉非又心有心性心能作佛境有心性安不作佛以心收境則心中見佛是境界之佛以境收心則境中見佛是唯心如來心佛重重者卽兩鏡之重重而本覺性一者卽尊容之雙入  
皆取之不可得則心境兩亾照之不可窮則理智交徹

皆取之不可得下第三雙融前二以成止觀心境兩亾卽止理智交徹卽觀心境旣爾境境相望心心互研萬化紛綸皆一致也

唯證相應名佛華嚴矣

心境既爾下第四結例一切境有多境心有多心各自相對一一互相融也萬化皆然卽總結例唯證相應則泯同果海也

第二釋品名者梵云薩婆嚩鷄印擎併驃訶奈耶鉢櫳叵  
娜惣鉢里勿多此云一切世間主莊嚴法門威德名品今文存略

第二釋品名疏文有四一會梵音二釋義理三立名所以四會釋晉經今初疏中一時總對若別對者薩婆一切也衆鷄世間也印擎併主也驃訶莊嚴也奈耶法門也鉢櫳叵婆威德也娜惣名也鉢里勿多品也

世者時也卽是世間主者君也謂卽諸王及佛然世間有三一器世間卽是化處二衆生世間卽所化機三智正覺世間卽能化主主則唯二諸王及佛主於器界及衆生故佛非世間從所統受稱

世者時也下第二釋義理也於中二先釋世主妙謂法門體用深廣難思卽主之所得嚴謂莊嚴乃有多義一器世間嚴謂其地堅固等二衆生世間嚴謂衆海各具法門威德故三智正覺世間嚴謂於一

切法成最正覺三業普周法門無盡故所以長行諸王之嚴偈頌讚德皆顯嚴佛

後妙謂下釋妙嚴於中三初正明三世間嚴

衆生不嚴不感佛興正覺不嚴不能爲主器界不嚴非真佛處

次衆生不嚴下出嚴所以

復由佛嚴顯遇者有德衆生嚴輔顯佛超勝如是互嚴亦爲妙嚴

後復由佛嚴下明三嚴相成

諸經無此廣嚴故但初名序品今明序已兼正故廣

讚諸嚴以爲華嚴之由序

諸經無此下第三顯立名所以彰異餘宗不名序品

舊云世間淨眼品者謂所得法眼能淨世間故餘如前說

舊云世間品下第四會釋晉經所得法眼卽今法門威德也

第十別解文義文分爲二初總釋經序二別解文義初中分三大方下初明題目天冊下二明造序人蓋聞下三直解序文今初卽經序題目也

8

4 5 6 7 8 9 100 1 2 3 4 5 6 7 8 9

大方廣佛華嚴經疏演義鈔卷第二十八

音釋

休寧奉佛弟子江元慧設貲刻此  
大方廣佛書嚴經疏演義鈔第廿八卷祈保家  
門道泰老幼申通詞六千七百五十四箇核

銀三兩三錢八分  
釋海亮對上元王自謙書戴伍刻  
萬曆丙辰歲仲春月徑山化城識

大方廣佛華嚴經疏演義鈔序卷第十九

天冊金輪聖神皇帝製

第二明造序人音義云冊測革反說文曰冊符命也謂上聖符信教命以授帝位字或從竹或古爲圓形也

蓋聞造化權輿之首天道未分

龜龍繫象之初人文始著

演義云蓋聞丁直解序文分爲六段初明佛曰未興羣生沉溺二及夫下明如來出世德用難思三朕曩下自慶逢時聞斯聲教四大方下別彰此

撰述

卷之二十一

高  
十

典旨趣玄微五緬惟下傳譯古今感慶逢遇六一  
 窺下總釋序意歎理自謙初中分三初明化法舛  
 異一明能化淺近三明所化迷淪初中亦二初辨  
 淳元之始二明三才已著今初益聞者發語之端  
 也造化者造作變化易繫辭云剛柔相推而成變  
 化又云變化者進退之象也權輿者爾雅云初哉  
 首基肇祖元胎倣落權輿始也二皆是始言天道  
 未分者謂元氣混沌未分天地下云人文始著卽  
 有三才始分天道今云未分卽五運之時也故易  
 鉤命決云天地未分之前謂之一氣於中有太易

太初太始太素太極爲五運運者數也謂時改易  
 初取易義元氣始散謂之太初氣形之端謂之太  
 始形變有質謂之太素質形已具謂之太極轉變  
 五氣故稱五運皆是天道未分也言天道者易繫  
 辭云易之爲書也廣大悉備有天道焉有人道焉  
 有地道焉說卦云昔者聖人之作易也將以順性  
 命之理是以立天之道曰陰與陽立地之道曰柔  
 與剛立人之道曰仁與義兼三才而兩之故易六  
 畫而成卦又云在天成象在地成形變化見矣注  
 云象況日月星辰形況山川草木又云易與天地

撰述

卷之二十一

三

高士

準故能彌綸天地之道仰以觀於天文俯以察於地理是故知幽明之故原始反終故知生死之說注云幽明者有形無形之象死生者始終之數也周易疏云天有玄象而成天文也地有山川原隰各有條理故云地理此上皆是已分之相因釋天道故便舉之此對正在未分之前耳龜龍繫象之初下第二對明三才已著之相略如向說易繫辭云是故天生神物聖人則之天地變化聖人効之天垂象見吉凶聖人象之河出圖洛出書聖人則之孔疏云如鄭康成之義則依春秋緯云河以通

乾出天包洛以流坤吐地符河龍圖發洛龜書感河圖有九篇洛書有六篇孔安國以爲河圖則八卦是也洛書則九疇是也音義云堯有神龜負圖而出舜感黃龍負圖而現人文始著者繫辭云古者庖犧氏之王天下也仰則觀象於天俯則觀法於地觀鳥獸之文與地之宜孔疏云此下明聖人法自然之理而作易象次易又云近取諸身遠取諸物於是始作八卦以通神明之德以類萬物之情釋曰上云圖出八卦今云觀乎天地者或見龜復象天地等於理無違音義云觀乎天文以察時

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

變觀乎人文以化成天下此非正意後人用之耳君臣父子尊卑上下謂之人文龜龍舉三皇之時斯爲上古繫象舉於夫子卽是下古然其文王爲中古旣有卦爻之辭已有象矣則總該三古又上云天道卽言未分今云人文則言始著一言影略則初分之時亦皆未著直至繫象已具方曰著明故先有者卽易有太極是生兩儀兩儀生四象四象生八卦八卦定吉凶吉凶生大業卽三才具矣雖萬八千歲同臨有截之區七十二君詎識無邊之義

雖萬八千歲下第二明能化淺近按帝王甲子記云天皇氏治一萬八千年地皇氏治九千年人皇氏治四千五百年有本云三皇皆治一萬八千年故云萬八千歲言同臨有截之區者詩注云截者齊也區者域也謂四海域內率服齊整言七十二君詎識無邊之義者司馬相如封禪書云繼昭穆受謚號略可道者七十有一君故管子云昔者封泰山禪梁父者有七十二家梁父卽泰山下小山名也詎者何也明上七十二家賢明之君何能識於稱性玄理無邊之義

1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9

撰述

重刊本印光堂藏書卷之二十一

四

重刊

由是人迷四忍輪迴於六趣之中家纏五蓋沒溺於三途之下

由是人迷四忍下第三明所化迷滯言由是者上明化主化法二皆淺近蓋是城中一身之作不令所化免沉苦海於中上對迷理輪迴六趣下對纏妄沒溺三途言四忍者卽思益經第四法品中佛言梵天菩薩有四法善出毀禁之罪何等爲四一者得無生忍以諸法無來故二者得無滅忍以諸法無去故三者得因緣忍知諸法因緣生故四者得無住忍無異心相續故是爲四忍言人迷者人

人皆迷故但迷四忍容漂人天故云輪迴於六趣之中家纏五蓋則溺三途矣五蓋者一貪欲二瞋恚三惛沉四掉舉五疑也言家纏者家家纏也上三皆明佛未興世

及夫鷲巖西峙象駕東驅

及夫鷲巖下二明如來出世德用難思於中四一總歎化主高二明能化時處長廣三別歎如來勝德四結德歸於如來初中四句分二前二句總序佛教興流後二句寄對顯勝今初上句明主出西天故云鷲巖西峙峙者立也此約處歎人後句卽

撰述

卷之二十九

五

真言

化法東被也故云象駕東驅言象駕者略有二義  
 一千年後像法之時佛教方被故二者象駕經  
 故初雖白馬來儀本用象故爲對鷲巖故用象駕  
 宋公題安國寺詩云爲龍太子去駕象法王歸  
 慧日法王超四大而高視中天調御越十地以居尊  
 慧日法王下第二寄對顯勝初句出域後句超因  
 今初慧日法王超四大而高視者出域中也則異  
 前化在域中慧日者以佛爲日略爲四義一破闇  
 如慧二照現如智三輪淨如解脫四上三不相離  
 如同法界於法自在故稱法王言超四大而高視  
 者卽老子道經云道大天大地大王亦大域中有  
 四大而王居其一焉人法地地法天天法道道法  
 自然釋曰然其說道乃是清淨虛通故云道法自  
 然自然者不知其所以然而然故卽世界始成域  
 中近事不達業因故曰自然今佛出現善證真常  
 妙第二諦天地造化乃俗諦業因域中之事耳後  
 句超因言中天調御越十地以居尊者十地菩薩  
 時經三祇已斷十障已證十如成十勝行化周十  
 方今比世尊猶一塊土以方大地況於四大何足  
 越哉

撰述

# 包括鐵圍延促沙劫

包括鐵圍下第二明時處長廣初句約處略舉三千大鐵圍內以爲化境豈同上說有截之區後句約時多劫促爲一念一念延爲多劫豈同上說萬八千歲

其爲體也則不生不滅

其爲體下第三別歎如來勝德中卽雙明化主化法就三大歎之初歎體大經云佛身無生超戲論非是蘊聚差別法又云佛以法爲身清淨如虛空又云一切法無生一切法無滅若能如是解斯人

## 見如來

其爲相也則無去無來

其爲相下第二歎相大經云如來非以相爲體但是無相寂滅法身相威儀悉具足世間隨樂皆得見旣無相爲相故湛無去來德周法界亦無來去念處正勤三十七品爲其行慈悲喜捨四無量法運其心方便之力難思圓對之機多緒

念處正勤下第三歎用大初約化法化法玄妙異前域中卽行唯道品心唯四等方便多門圓應難測並如經說言圓對者身則圓迴普應若月落百

1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9

川音則稱物普聞若風吹萬籟意則刹那頓覺若海印炳然故云多緒言之可述

混太空下二約化體明用謂大之則無外細之則無內經云譬如虛空徧至一切色非色處亦如虛空具含衆相刹塵爲量不可數知故云豈算數之能窮後句細入無間卽入纖芥之微區故下經云如於此會見佛坐一切塵中亦如是塵中有刹刹復有塵塵復有刹重重無盡非心識思量之境故

絕名言表義名言難述卽言語道斷顯境名言不知卽心行處滅亦是明化處周細前句化周法界後句細無不入經云一一毛端悉能容受無邊世界而無障礙示現調伏無量衆生

無德而稱者其唯大覺歟

無德而稱下四結德歸於如來謂上之三段皆屬如來則歎不可盡論語云泰伯其可謂至德矣三以天下讓民無得而稱焉故經云刹塵心念可數知大海中水可飲盡虛空可量風可繫無能盡說佛功德卽其事也

撰述

卷之三十九

高一

朕曩劫植因叨承佛記金仙降旨大雲之偈先彰玉  
泉披祥寶雨之文後及

朕曩下三自慶逢時中分三初遠蒙佛記二彌荷  
太平三萬國朝宗今初朕曩劫植因者久遠種因  
故得大覺親記叨者忝也從金仙下別明記相初  
明大雲經或有疑僞後玉扆下明寶雨經鄭氏注  
周禮云展屏風也天子屏風以玉爲飾寶雨經有  
十卷入開元正錄第一卷中云爾時東方有一天  
子名日月淨光乘五色雲來詣佛所右繞三匝頂  
禮佛足退坐一面佛告天子汝之光明甚爲稀有

天子汝於過去無量佛所曾以種種香華珍寶嚴  
身之物衣服卧具飲食湯藥恭敬供養種諸善根  
天子由汝夙種無量善根因緣今得如是光明顯  
耀天子是因緣故我涅槃後四五百年法欲滅  
時汝於此瞻部洲東北方摩訶支那國位居阿鞞  
跋致實是菩薩故現女身爲自在主經營於多歲正  
法理化養育衆生猶如赤子令修十善能於我法  
廣大住持建立塔寺又以衣服飲食卧具湯藥供  
養沙門於一切時常修梵行名日月淨光餘如彼  
經釋曰此時更無女主弘建若是斯言不虛

1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9

加以積善餘慶俯集微躬遂得地平天成河清海晏  
加以積善下二荷太平易云積善之家必有餘慶  
積不善之家必有餘殃今由積善故得地平天成  
河清海晏晏猶安也

殊禎絕瑞旣日至而月書貝牒靈文亦時臻而歲洽  
踰海越漠獻琛之禮備焉架險航深重譯之詞罄矣  
殊禎絕瑞下第三萬國朝宗重譯來貢初兩對標  
謂萬方仰德殊異禎祥奇絕瑞應日日而至月月  
而書書之史冊也貝牒靈文亦時時而至歲歲沾  
洽也二踰海下兩對釋成初成上禎瑞而至後駕

險下成上貝牒臻洽踰海航深皆水行也越漠架  
險皆陸路也

大方廣佛華嚴經者斯乃諸佛之密藏如來之性海  
視之者莫識其指歸挹之者罕測其涯際

大方廣下第四別歎此典旨趣玄微於中二初總  
歎次別歎今初先二句標其深廣後視之者下成  
上二句旣爲秘藏故視之不見稱爲性海安測邊  
涯挹者珠叢云以器斟酌於水也故文選頭陀寺  
碑云蓋聞挹朝夕之池者無以測其淺深仰蒼蒼  
之色者難以知其遠近故今測量若以管窺天用

蠡測海也

有學無學志絕窺覩二乘三乘寧希聽受

有學無學下第一別歎於中三初約人歎二約法歎三約處歎初中二先對劣顯勝後當體顯勝前中初句通說三乘後句別說三乘然二乘在座如聾如盲三乘菩薩積行多劫不能測故窺者左傳云謂舉足而視覩者珠叢云有所冀望

最勝種智莊嚴之跡既隆普賢文殊願行之因斯滿最勝種智下二當體顯勝上句約果滿以滿二嚴成種智也下句約因圓普賢之行文殊之願二皆

圓也亦得行願通上二聖

一句之內包法界之無邊一毫之中置刹土而非隘一句之內下二句約法歎於中上句約能詮深廣故一句之義竭海墨而不盡下句約所詮事事無礙故一毫之中置刹土而非隘也

摩竭陀國肇興妙會之緣普光法堂爰敷寂滅之理摩竭提國下第三約處歎舉摩竭者九會本故不起覺場而周徧故舉普光者近菩提場又說信門

該於果海故云爰敷寂滅之理

緬惟奧義譯在晉朝時踰六代年將四百然一部之

典纔獲三萬餘言唯啓半珠未窺全寶

緬惟奧義下第五傳譯古今感慶逢遇於中二初明前譯多闕二明今譯多具今初緬者遠也惟者思也六代卽晉宋齊梁陳隋也言唯啓半珠未窺全寶者卽涅槃聖行品雪山童子聞化羅刹云諸行無常是生滅法驚而顧視唯見羅刹問羅刹云大士汝於何處得是過去離怖畏者所說半偈大士汝於何處而得如是半如意珠釋曰次下半偈義未全故若得聞下生滅滅已寂滅爲樂卽全寶也今明先譯旣闕卽爲半珠也

朕聞其梵本先在於闐國中遣使奉迎近方至此旣覩百千之妙頌乃披十萬之正文

朕聞其梵本下第二明今譯多具卽全寶也文中  
有六一邀迎二正譯三感徵四事畢五讚益六慶  
遇今初邀迎事如玄談

粵以證聖元年歲次乙未月旅沽洗朔惟戊申以其  
十四日辛酉於大遍空寺親受筆削敬譯斯經  
粵以證聖下第二正譯也月旅沽洗者正當三月  
言親受筆削者則天躬自刊削言筆削者漢書衛  
青傳云削則削筆則筆削謂刪去筆謂增益有云

理書勘受削而注之良以古人書木竹簡以刀削故

遂得甘露流津預夢庚申之夕膏雨灑潤後覃壬戌之辰式開實相之門還符一味之澤

遂得下第三感徵也十四日是辛酉庚申卽十三日壬戌卽十五日前後一日各有感徵謂則天於十三日夜夢見徧天之內皆降甘露十四日覃開譯經十五日天降甘露覃者爾雅云及延也郭璞注云謂蔓蓮相被及也式開下成上徵祥此二句亦可通上二瑞謂皆一味之澤亦可式開實相成

上甘露甘露不死之藥況實相之常住故一味之澤成上膏雨一雲一雨無異味故式者用也

以聖曆二年歲次己亥十月壬午朔八日己丑繕寫畢功

以聖曆二年下第四事畢己亥取於乙未首涉五年繕寫方畢繕者說文云補也珠叢云治故造新皆謂之繕

添性海之波瀾廓法界之疆域

添性海下第五讚益有二先明益教理大波曰瀾玄言曰廓者張小使大鄭玄注禮云疆者界也說

文云域者封也謂玄言既加添足性海開廓法界矣

大乘頓教普被於無窮方廣真筌遐該於有識  
大乘頓教下第二辨益物機

豈謂後五百歲忽奉金口之言娑婆境中俄啓珠函  
之祕

豈謂下第六慶遇也於中有二初明慶遇前句約  
惡持得聞是一幸也後一句約惡處得聞此二幸  
也初言後五百者如來滅後有五百年第一五  
百年解脫堅固今當第四五百年故云後也在三

五之後故金剛經中於後五百歲信受者難得言  
俄啓珠函之秘者卽智論第六十四云般若是如意  
珠舍利如函篋舍利中雖無般若而爲般若之所  
熏故得一與供養千反生天今用此是則如來  
如函華嚴經是如意珠也

所冀闡揚沙界宣暢塵區並兩曜而長懸彌十方而  
永布

所冀闡揚沙界下二發願於中二先兩句橫徧沙  
界麤相徧也言塵區者明微細徧徧微塵中之區  
域故後並兩曜而長懸下明豎窮長懸永布故兩

曜卽日月喻如來根本後得智也

一窺寶偈慶溢心靈二復幽宗喜盈身意

一窺寶偈下第六總彰序意讚理自謙有三先兩  
句正製序由以披尋覩味慶喜深故鄭箋詩云復  
謂反復珠叢云復謂重審察卽是南容三復白珪  
疏中已引

雖則無說無示理符不二之門然因言顯言方闡大  
千之義

雖則無說下讚理離言要假言顯無說無示卽淨  
名目連章之文不二之門卽淨名不二法門品因

言顯言者若無文殊讚默之言安知無言之爲妙  
故寂滅之相假以言詮言大千之義者卽出現品  
塵含經卷喻故大千經卷潛塵無益聰慧者開便  
能益物今假言顯義當開塵不於經卷有成益也  
輒申鄙作爰題序云

輒申已下謙已結成上已略釋序竟

第二別解文義者然此經文富義博勢變多端況一  
義一文包攝法界是以古德用十例科判欲顯難思  
其第一名本末部類但顯此經無盡非科今文前已  
具明故今略之加前後鉤鎖亦有十例

1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

第一別解文義分二初總科判一正釋經文初中  
分三初標章二列名三解釋

一本部三分科二問答相屬科三以文從義科四前後攝疊科五前後鉤鎖科六隨品長分科七隨其本會科八本末大位科九本末徧收科十主伴無盡科一本部下二列名也

初本部三分者謂序正流通初品爲序分現相品下爲正宗

初本部三分下三解釋分十初本部三分科分二初正明序正一別釋流通今初正明序正

流通有無古有七釋一光統律師以法界品爲流通由入法界廣無邊故二隋遠法師以法界品內善財下屬流通寄人顯法故三裕法師以法界品後偈爲流通以歎德無盡故四有云末後二頌爲流通以結說無盡歎德勸修故五或云經來未盡故無流通六或云以餘眷屬經爲此流通以彼是此所流出故七或云此經總無流通以法無盡說無休息故故諸會各無流通不同大般若諸會皆有有流通故

流通有無下二別釋流通有三初序昔說一會昔義三申今正解今卽序昔也

此上七解各是一理而前六皆有第七獨無若義會之應成四句一有序正無流通如第七二唯正宗無二分由自初暨後皆顯玄微並悟物故初雖列衆而歎佛德後雖寄人有修相故三具三分四俱不可說卽言忘言故約義包含不可局取

此上七解下二會旨義也謂會前七師融成四句一卽第七師三卽前六師二四義加二唯正宗者意取悟入顯理爲正宗故故河西道朗云若因初分以得悟則初分爲正若因後分以得悟則後分非傍卽斯義也其中有與理相應者隨時取捨

今依具三以分三分之興彌天高判冥符西域今古同遵

今依具三下第三申今正解文分爲四初立取源由二辨三之相三例成前義四辨定流通今初謂上顯義理包含縱成四句依文釋義三分可依若無流通序正安立若唯有正起盡不明若約無言如何解釋

所以三者夫聖人設教必有其漸將命微言先彰由致故受之以序分由致旣彰當機受法故受之以正宗正宗旣陳務於開濟非但篤於時會復令末葉傳

撰述

卷之二十一

十一

芳永耀法燈明明無盡故受之以流通

二所以下辨三之相

非唯一部當會當品等皆容有之故依三也

非唯一部下三例成前義未會品之文尚須三分

何況一部不立三耶

雖六解皆通今依第二以寄人進修示物有分流通相故故慈氏云若有敬慕心亦當如是學

雖六解皆通下四辨定流通文分爲三初取其正義二辨前順違三結歸正義今初也

初之一解令正宗中關於證入

初之一解下二辨前違順出前不取五釋所以言令正宗中關於證入者此卽光統以法界品爲流通法界是證入因果衆海大問新衆遠集佛自入定衆海頓證判爲流通已抑經文況正宗中但有信解行而無證入

第三但屬善財之一相故

第三但屬下此卽裕公以法界後偈爲流通但是善財五相之中顯因廣大相之一半故非一部流通末後二偈但結偈中佛德非通一部

1 2 3 4 5 6 7 8 9 100 1 2 3 4 5 6 7 8 9 100 1 2 3 4 5 6 7 8 9

未後二偈下但言有云卽刊定記主意用此義言  
但結偈中佛德者以普賢向讚如來言不能盡故  
總結云刹塵心念可數知大海中水可飲盡虛空  
可量風可繫無能盡說佛功德若將結歎佛德爲  
流通則一部之中無菩薩德

### 十行等末類有此偈

十行等者上以義破此以文破彼非經終而有此  
偈故今此偈非是一部用爲流通但當會當品流  
通意耳言十行末偈者偈云菩薩功德無有邊一  
切修行皆具足假使無量無邊佛於無量劫說不

盡何況世間天及人一切聲聞及緣覺能於無量  
無邊劫讚歎稱揚得究竟釋曰法界偈末結佛德  
無盡此結十行菩薩之德不可盡耳而言等者等  
取十向十地十向末云一切衆生猶可數三世心  
量亦可知如是普賢諸佛子功德邊際無能測一  
毛度空可得邊衆刹爲塵可知數如是大仙諸佛  
子所住行願無能量此結迴向行願無盡十地末  
云十方國土碎爲塵可於一念知其數毫末度空  
可知量億劫說此不可盡而言此者明此上十地  
德無盡耳是知位位品品德德之末皆結無盡故

非一部之流通也

經來未盡未必在後

經來未盡者破第五師言未必者容許後有但不必定耳如毘盧遮那品末或隨好品末等既不必有故難取定

眷屬流通但約義故

眷屬流通者卽第六師以約義理於一佛乘分別說三根本法輪攝彼眷屬故云攝羣經爲眷屬何必將彼爲此流通此中有序不用彼序何獨用彼爲此流通

故依遠公

三結歸正義也

二問答相屬科者古云此九會中大位問答總有五  
番第一會中大衆起四十問或當會答盡名舉果勸  
樂生信分二從第二會初有四十問至第七會末答  
盡名修因契果生解分中間雖有諸問並是隨說隨  
問非是大位問答不思議品不問因故三第八會初  
起二百問當會答盡名託法進修成行分四第九會  
初起六十問如來自入師子頻申三昧現相答名頓  
證法界分五福城東善財求法等別問別答名歷位

漸證分

第二問答相屬科文分爲二初通叙昔說二密示今意今初古云此九會者疏意存四故舉古釋以第五無大位問答故

古德以善財猶屬正宗故今旣判入流通則前唯四兼取流通以爲五分未爽通全

古德以善財下二密示今意意有其二故但爲四五無大位問故二第五屬流通故故云今旣判入流通則前唯四第四應名依人證入成德分兼取流通者順於古義第一分中旣攝一部序分不於正宗之內分爲五分故取流通爲第五分理亦無違但無大位之間故疏合四耳

三以文從義科者此經一部有五周因果卽爲五分初會中一周因果謂先顯舍那果德後遮那一品明彼本因名所信因果二從第二會至第七會中隨好品名差別因果謂二十六品辨因後三品明果亦名生解因果三普賢行品辨因出現品明果卽明平等因果非差別顯故亦名出現因果四第八會初明五位因後明八相果明出世因果亦名成行因果五第九會中初明佛果大用後顯菩薩起用修因名證入

釋述

寶鏡卷之二十一

真一

因果因果二門俱證入故各分因異果亦爲十也

第三以文從義科謂據現文但有其四四位大問  
故就第二分中有差別平等二義故分爲五周因  
果初明五位因等且依一相以八相是應現故故  
屬果攝若尅實而言成如來力下四門方是其果  
前一百九十六門皆屬因攝若以八相爲果果有  
一十九門餘皆屬因言名出世因果者品名離世  
間故言亦名成行因果者廢於位名意在行故  
四前後禡疊科者一部分二謂前九會是本會亦是  
佛會佛爲主故從文殊至福城東已後並是末會亦

是菩薩會以諸善知識爲會主故二就前中亦二初  
八會明所成解行後一顯所證法界三就前中復二  
初七會明歷位修成行後一明圓融周普行四前中  
復二初明修生因果復普賢下二品明修顯因果五  
就前復二初明修生因後不思議法等三品明修生  
果六就前復二初明位中因行後十定下六品明位  
後之行七就前復二初明地前比行後第六一會明  
十地證行八就前亦二初位前十信行後第三會已  
去三會明入位三賢行九就前亦二初明所信佛果  
法後問明品下三品明能依能信菩薩行十就前中

1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

復二初會明佛依報果後名號下三品明佛正報果  
 四前後禡疊科者雖有十重總爲一分從後倒禡  
 節節除後就前分二故初位前者以四十二位明  
 義十信未成位但爲住因故仁王詔十住爲十信  
 果故取能成信詔所成住故五前後鉤鎖科亦分爲十  
 五前後等者卽是新意文中二初標數二正釋  
 一第一會爲依報因果前明依報果後毘盧遮那品  
 辨因二更取毘盧遮那及第二會初三品爲正報因  
 果前因後果三以名號至菩薩住處名依起因果依  
 於本有而修起故前果後因四從問明品至隨好品  
 明差別因果前因後果

一第一會下第二正釋也於中分三初通釋前四  
 二別釋第五三通釋後五今初然文有十節謂一  
 經初五品二毗盧遮那品三名號下三品四問明  
 至住處有二十三品爲一節五不思議至隨好三  
 品爲一節六普賢行品爲一節七如來出現品爲  
 一節八離世間品爲一節九八法界品爲一節初  
 後不重用但合有八重因果以第九離世間品及  
 第十法界各自爲一重因果故得爲十

1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

五取不思議下至普賢行品爲圓融因果前果後因  
五取不思議下二別釋第五文分爲四初正釋二  
解妨三引證四結成今正釋也

以不思議等與前爲果果別於因與後爲果則一一  
融攝

以不思議下一解妨謂有問言差別圓融二義非  
一如何前差別果得爲圓融果耶故通意云雖不  
思議等經文是一所望異故果別於因成差別因  
果果自圓融得成圓融之果言圓融者以一一德  
周法界故三十六門門門之中含十句故所說之

相難測量故品名標爲不思議故

然有六義證成

然有六義下三引證證成不思議等三品爲普賢  
行之果普賢行品是不思議等因

一因果相屬科中多先果後因故

一因果相屬者五周因果所信證入二果居先差  
別因前亦先有果故云多先果也今亦先果後因  
與例同也而言因果相屬科者卽前第三以文從  
義科也謂從因果相屬之義科成五故  
一四十八後未有證成普賢行後有證成者結屬前

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

故

二四十八後等者若不思議至隨好唯屬差別因果既終合有現瑞證成今却無證普賢行品既唯屬出現之因既未說果何得有證明知普賢行竟有證結屬前來不思議等故

三普賢行品初無別發起便卽躡前云略示如來少分境故

三普賢行品初等者若不屬此品之初應合別有發起旣無發起明是屬前

四以義明之不思議法顯佛德難思一一圓融故

四以義等者果德難思不可但爲差別果故

五前雖有問不思議品初重念問故

五前雖有問等者卽第二會初之問而復問者欲顯不思議下難思是圓融因果之初故

六第二會初已有三業爲差別果故

六第二會初等者前若無果要用不思議等爲差別果前旣已有此不思議等全屬於後前段差別因果亦足

由斯六義故普賢行品得屬前因

由斯六義下四結成第五圓融因果也

撰述

卷三十九

三十五

解一

六取普賢行及出現品爲平等因果前因後果

六取普賢行已下三通釋後五也

七取出現及離世間品爲出現因果前果後因成佛涅槃亦因現故非說真成

成佛涅槃下此遮外難恐有難云離世間品自有因果那得總爲出現家因故爲此通

由離世間爲因方能現世

由離世間下釋爲出現因義

八離世間品爲成行因果通辨行故具因果故

八離世間等者當會自成因果

九取離世間品及法界品爲法界因果前因後果由離世間稱法界故因不依位果唯證入

九全合兩會爲一因果

十法界一品自爲證入因果先果後因其善財已下亦爲無盡因果先因後果故歷事至普賢一毛因則無盡普賢說佛德過虛空而果無盡以爲流通故不明之

十一以入法界當會目成因果然第八會雖不鉤前  
前出現品已曾鉤此第十因果不鉤第八會第八  
會已曾鉤第九故並得名爲鉤鎖因果其善財下

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

歷事爲因普賢說佛德爲果故  
六隨品長分科者長分有十  
六隨品長分科者不約會分總爲直科二十九品  
以爲十分耳

一通辨教起因緣分二現相品下明佛果無涯大用  
分

二現相下明佛果無涯大用分者現相品大用在  
義可知普賢三昧言大用者同加普賢不來而至  
一多延促皆無礙故毛光讚德無不周故成就華  
藏皆說如來徧淨法界徧應刹海令依正相入塵

舍法界皆無涯大用也

三毘盧遮那品舉彼往因證成分四名號下三品明  
大用應機普周分五問明品下至十地品末明諸位  
差別令修分六十定品下至隨好品未明差別因圓  
果滿分十普賢行品下二品明普行因成現果分八  
離世間品明因果超絕世間分九法界品中前分明  
大衆頓證法界分十爾時文殊下明一人歷位漸證  
分

七隨其本會科者亦爲十分一初會名舉果令信分  
二第一會明能信成德分三第二會初賢十住分四

撰述

吉原系譜卷之二

十一

一

第四會中賢十行分五第五會上賢十向分六第六會聖位十地分七第七會因圓果滿分八第八會普賢大行分九第九會初行成行成證入分十善財下善友教證分

十善財下若據標云隨其本會科會各一分只成九分欲顯圓十故開後一據實合有十會表圓或經來未盡且按文釋耳

八本末大位科者本會爲九末會有五十五總爲六十四分

九本末徧收科者先總會爲九分文殊爲六千比丘

說法爲第十分及善財歷一百一十善知識總一百二十分若開諸龍及三乘會及彌勒後文殊普賢人便成一百二十五以慈氏云此長者子經由一百一十善知識已然後而來至於我所則彌勒已前已有一百一十故及三千大千世界微塵數善友其分數彌多若合爲一則一百二十六分

申若開諸龍者前爲百二十分則諸龍三乘皆屬善財會初以初至福城本爲善財故故不別開諸乘等會今約雖至福城城中善則等二千四衆尚未出城先說普照法界修多羅利益諸龍及三乘人

故別開之餘並可知

十主伴無盡科者一一會一一品一一法皆結通十方如此間說十方虛空法界一切世界乃至一切塵中皆如是說此結主經也又彼一一會等皆有他方塵數菩薩而來證法此結伴也卽主伴相與周徧法界重疊無盡是則段數亦無盡無盡也

大方廣佛華嚴經疏演義鈔卷第二十九

音釋

隰似立下濕也辰於機賾切賾丑林切覲庚俱切禡之涉切  
休寧奉佛弟子金元端施刻此經詩九千九百九十八箇該銀五百萬曆丙辰徑山化城識

80

1

2

3

4

5

6

7

8

9

90

1

2

3

4

5

6

7

8

9

100

1

2

3

4

5

6

7

8

9

10

11

12

13

14

15

16

17

18

19

一  
廿五